

**BOSNA I HERCEGOVINA
FEDERACIJA BOSNE I HERCEGOVINE
VLADA**

NACRT

**ZAKON
O IZMJENAMA I DOPUNAMA ZAKONA O PROFESIONALNOJ
REHABILITACIJI, OSPOSOBLJAVANJU I UPOŠLJAVANJU
OSOBA SA INVALIDITETOM**

Sarajevo, srpanj, 2013. godine

**ZAKON
O IZMJENAMA I DOPUNAMA ZAKONA O PROFESIONALNOJ
REHABILITACIJI, OSPOSOBLJAVANJU I ZAPOŠLJAVANJU OSOBA S
INVALIDITETOM**

Članak 1.

U Zakonu o profesionalnoj rehabilitaciji, osposobljavanju i zapošljavanju osoba sa invaliditetom („Službene novine Federacije BiH“ broj : 9/10) u članku 1., članku 5. st. 1. i 2., članku 6., članku 12. st. 3. riječi: “smanjena radna sposobnost”, zamjenjuju se riječima “ promijenjena radna sposobnost”, u odgovarajućim padežima.

Članak 2.

U članku 13. stavak 3. mijenja se i glasi:

“ Bliže uvjete za osnivanje i rad ustanove, posebno u pogledu prostora, opreme i stručnog kadra, propisuje kantonalni ministar nadležan za poslove socijalne skrbi, a za ustanove koje se registričaju na nivou Federacije, federalni ministar za rad i socijalnu politiku.”

Članak 3.

U članku 15. stav 6. mijenja se i glasi:

“Pravo na zapošljavanje pod posebnim uvjetima imaju osobe sa invaliditetom sa najmanje 60% invaliditeta, osobe sa najmanje 70% tjelesnog oštećenja, ukoliko to oštećenje ima za posljedicu promjenu radne sposobnosti iz članka 3. ovog Zakona i osobe sa smetnjama u intelektualnom razvoju i funkcioniranju”.

Članak 4.

U članku 17. iza stava 1. dodaje se novi stav 2. koji glasi:

“Federalni ministar nadležan za rad i socijalnu politiku (u daljnjem tekstu: ministar) donijet će propis kojim će se utvrditi radna mjesta i poslovi na kojima pri zapošljavanju lica sa invaliditetom, uz zadovoljavanje ostalih potrebnih uvjeta, prednost imaju lica sa 100% invaliditetom, u roku od 90 dana od dana stupanja na snagu ovog Zakona”.

Članak 5.

Iza članka 17. dodaje se novi članak 17 a. koji glasi:

“Članak 17 a.

O poslodavcima koji zapošljavaju osobe s invaliditetom vodi se posebna evidencija kod Fonda za profesionalnu rehabilitaciju i zapošljavanje osoba s invaliditetom.

Evidencija iz stava 1. ovog članka sadrži pored općih podataka i sljedeće podatke:

- ukupan broj zaposlenih;
- broj zaposlenih osoba s invaliditetom;
- podatke o stupnju i vrsti invaliditeta zaposlenika s invaliditetom;
- podatke o kvalifikaciji i stručnoj osposobljenosti zaposlenih osoba s invaliditetom i poslovima i radnim zadacima koje one obavljaju.

Svi poslodavci dužni su jednom godišnje, a najkasnije do 31. 03. tekuće godine za prethodnu godinu, dostaviti Fondu za profesionalnu rehabilitaciju i zapošljavanje osoba s invaliditetom popunjen evidencijski obrazac s podacima iz stava 2. ovog članka.

Ministar će propisati sadržaj i način vođenja evidencije iz stava 1. ovog članka u roku od 90 dana od dana stupanja na snagu ovog Zakona”.

Članak 6.

Članak 18. mijenja se i glasi:

“Svi poslodavci iz članka 15. stav 2. ovog zakona dužni su imati do 31. prosinca 2013. godine najmanje jednu zaposlenu osobu s invaliditetom na svakih 16 zaposlenih.

Subjekti koji ne ispune obvezu iz stava 1. ovog članka dužni su mjesečno pri isplati plaća obračunati i uplatiti u Fond za profesionalnu rehabilitaciju i zapošljavanje osoba s invaliditetom poseban doprinos za poticaj zapošljavanja osoba s invaliditetom u visini 25% od prosječne bruto plaće u Federaciji prema posljednjem objavljenom podatku Federalnog zavoda za statistiku, za svaku osobu s invaliditetom koju su bili dužni zaposliti u skladu sa stavom 1. ovog članka.

Poslodavac, uključujući i samostalne poduzetnike, koji s obzirom na ukupan broj zaposlenih ne podliježe obvezi iz stava 1. ovoga članka dužan je, osim ako ima zaposlenu najmanje jednu osobu s invaliditetom, svakog mjeseca prilikom isplate plaća i drugih primanja, uplaćivati u Fond za profesionalnu

rehabilitaciju i zapošljavanje osoba s invaliditetom poseban doprinos za poticaj zapošljavanja osoba s invaliditetom u visini 0,5%, bruto: plaće, naknade plaće i drugih primanja koji imaju karakter plaće.

Kontrolu ispunjenja obveze poslodavaca da zaposle određeni broj osoba s invaliditetom iz stava 1. ovog članka, kao i obveze da dostave potrebne podatke o zaposlenosti osoba s invaliditetom i evidentiraju se kod Fonda za profesionalnu rehabilitaciju i zapošljavanje u skladu sa člankom 17 a. ovog zakona, vrši Federalna uprava za inspekcijske poslove.

Kontrolu obračuna i plaćanja doprinosa iz st. 2. i 3. ovog članka, vrši Porezna uprava Federacije Bosne i Hercegovine.

Obveze iz st. 2 i 3 ovog članka ne odnose se na strana diplomatska i konzularna predstavništva, privredna društva za zapošljavanja osoba s invaliditetom, zaštitne radionice, radne centre, ustanove za profesionalnu rehabilitaciju i organizacije osoba s invaliditetom”.

Članak 7.

Članak 19. mijenja se i glasi:

“Na obvezu obračunavanja, plaćanja, izvještavanja, dospijeća za uplatu, obvezu plaćanja zatezne kamate u slučaju neplaćanja posebnog doprinosa za poticaj zapošljavanja osoba s invaliditetom u propisanom roku i ostale obveze poslodavca vezane uz posebni doprinos iz članka 18. st. 2. i 3. ovog zakona, te na nadležnost zaprimanja izvještaja, evidentiranje, naplatu, nadzor, zastaru utvrđivanja i prava na naplatu posebnog doprinosa, vođenje drugostupanjskog i prekršajnog postupka, primjenjuju se posebni propisi koji uređuju doprinose za obvezna osiguranja, kao i opći porezni propisi te provedbeni propisi doneseni na temelju tih propisa, ukoliko ovim zakonom nije drugačije propisano.

Poseban doprinos iz članka 18. st. 2. i 3. ovog zakona, uplaćuje se u korist uplatnog računa Fonda za profesionalnu rehabilitaciju i zapošljavanje osoba s invaliditetom propisanog provedbenim propisom o načinu uplaćivanja javnih prihoda proračuna i vanproračunskih fondova, kojeg donosi federalni ministar financija.

Poseban doprinos iz članka 18. st. 2. i 3. ovog zakona započinje se obračunavati i uplaćivati s obračunom i uplatom plaća ili doprinosa za obvezna osiguranja za siječanj 2011 godine”.

Članak 8.

U članku 22. iza stava 1. dodaju se novi stavovi 2. i 3. koji glase:

“Privrednom društvu prestaje status privrednog društva za zapošljavanje osoba s invaliditetom, ako u tijeku rada ne održava odnos zaposlenih u skladu s člankom 21. stav 1. ovog zakona.

U slučaju iz stava 2. ovog članka, rješenje o prestanku statusa privrednog društva za zapošljavanje osoba s invaliditetom donosi ministar, a na prijedlog

direktora Fonda za profesionalnu rehabilitaciju i zapošljavanje osoba s invaliditetom”.

Članak 9.

U članku 23. stav 3. briše se.

Članak 10.

Članak 24. mijenja se i glasi:

“Ministar formira komisiju koja utvrđuje uvjete za početak rada privrednog društva za zapošljavanje osoba s invaliditetom i dobijanje statusa privrednog društva za zapošljavanje osoba s invaliditetom, odnosno zaštitne radionice u skladu sa čl. 21., 22., 23. i 29. ovog zakona.

Polazeći od ocjene i mišljenja komisije iz stava 1. ovog članka, ministar će donijeti rješenje kojim se privrednom društvu priznaje status privrednog društva za zapošljavanje osoba s invaliditetom, odnosno zaštitne radionice.

U komisiji iz stava 1. ovog članka pored predstavnika Federalnog ministarstva rada i socijalne politike, mora biti najmanje po jedan član kao predstavnik Federalnog zavoda za zapošljavanje, Fonda za profesionalnu rehabilitaciju i zapošljavanje osoba s invaliditetom i udruženja osoba s invaliditetom”.

Članak 11.

Članak 29. mijenja se i glasi:

“Status zaštitne radionice ostvaruje privredno društvo za zapošljavanje osoba s invaliditetom ukoliko kumulativno ispunjava sljedeće uvjete:

- ako u odnosu na ukupan broj zaposlenih zapošljava najmanje 40% osoba sa 70% i više invaliditeta, a najmanje šest osoba s takvim invaliditetom i
- ako u odnosu na ukupan broj zaposlenih zapošljava 20% osoba sa 100% invaliditeta koja u skladu sa Zakonom ostvaruju pravo na dodatak za pomoć i njegu od druge osobe, pri čemu broj takvih osoba ne može biti manji od 3”.

Članak 12.

U članku 51. iza stava 2. dodaje se novi stav 3. koji glasi:

“Maksimalan iznos naknade iz stava 1. ovog članka, po jednoj zaposlenoj osobi s invaliditetom mjesečno, je iznos jednak visini dvije prosječne neto plaće u Federaciji prema posljednjem objavljenom podatku Federalnog zavoda za statistiku”.

Članak 13.

U članku 52. stav 2. mijenja se i glasi:

“Poslodavac može zahtjev za isplatu novčane nadoknade podnijeti po isteku obračunskog mjeseca, tromjesječja ili polugodišta tekuće godine, a najkasnije u roku od 30 dana od dana obračuna i uplate poreza i doprinosa”.

U stavu 3. broj “15” zamjenjuje se brojem “30”.

Članak 14.

U članku 53. iza stava 1. dodaje se novi stav 2., koji glasi:

“Na način podnošenja zahtjeva, uvjete i rokove za isplatu naknade i subvencije iz stava 1. ovog članka, primjenjuju se odredbe članka 52. ovog zakona”.

Članak 15.

U članku 62. stav 2. mijenja se i glasi:

“Upravni odbor Fonda ima pet članova od kojih su dva člana predstavnici organizacija osoba s invaliditetom, koje su osnivači ili vlasnici ustanova i privrednih društava za profesionalnu rehabilitaciju i zapošljavanje osoba s invaliditetom”.

Iza stava 2. dodaje se novi stav 3. koji glasi:

“Za članove Upravnog odbora Fonda ne mogu se birati direktori i uposlenici privrednih društava za zapošljavanje osoba s invaliditetom, direktori i uposlenici zaštitnih radionica i radnih centara i direktori i uposlenici ustanova za profesionalnu rehabilitaciju”.

Članak 16.

U članku 63. riječ “pet”, zamjenjuje se riječju “tri”.

Iza stava 1. dodaje se novi stav 2. koji glasi:

“Najmanje jedan član Nadzornog odbora je predstavnik organizacija osoba s invaliditetom, koje su osnivači ili vlasnici ustanova i privrednih društava za profesionalnu rehabilitaciju i zapošljavanje osoba s invaliditetom”.

Članak 17.

U članku 67., stav 1. točka 2. riječi “invalidnoj osobi” zamjenjuju se riječima “osobi sa invaliditetom”.

U točki 3., u tekstu u zagradi, ispred riječi: "članak 38." dodaju se riječi: "članak 17a. i".

Članak 18.

Ovaj Zakon stupa na snagu osmog dana od dana objavljivanja u "Službenim novinama Federacije BiH".

O B R A Z L O Ž E N J E
ZAKONA
O IZMJENAMA I DOPUNAMA ZAKONA O PROFESIONALNOJ
REHABILITACIJI, OSPOSOBLJAVANJU I ZAPOŠLJAVANJU OSOBA S
INVALIDITETOM

I - USTAVNI TEMELJ ZA DONOŠENJE ZAKONA

Ustavni temelj za donošenje ovog zakona sadržan je u odrednicama članka II.2.1./I, u vezi sa člankom III. 2.e/ Ustava Federacije Bosne i Hercegovine.

Prema odrednicama članka II.2.1./d/ i Ustava Federacije Bosne i Hercegovine, Federacija ima obvezu osigurati primjenu najviše razine međunarodno priznatih prava i sloboda, između ostalog slobodu na rad, kao i zabranu diskriminacije zasnovane na socijalnom porijeklu.

Prema odrednicama članka III.3./1/ i /2/ federalna vlast i županije su zajednički nadležni za socijalnu politiku, a u koju oblast spada i zaštita osoba s invaliditetom. Tu nadležnost ostvaruju zajednički ili odvojeno, ili od strane županija koordinirano od federalne vlasti. U pogledu ovih nadležnosti županije i federalna vlast dogovaraju se na trajnoj osnovici.

Prema odrednicama članka IV.A.20./d/ Ustava Federacije Bosne i Hercegovine, pored ostalih nadležnosti utvrđenih ustavom, Parlament Federacije nadležan je za donošenje zakona o vršenju funkcija federalne vlasti.

II – RAZLOZI ZA DONOŠENJE OVOG ZAKONA

Predloženim izmjenama i dopunama Zakona o profesionalnoj rehabilitaciji, osposobljavanju i zapošljavanju osoba s invaliditetom nastoje se otkloniti uočeni problemi vezani za njegovu primjenu, a koji se očituju u nekim nejasnim i dvosmislenim odredbama i nedorečenostima, a naročito u pogledu vođenja evidencija o zaposlenosti osoba s invaliditetom, mehanizama naplate posebnog doprinosa za poticanje zapošljavanja osoba s invaliditetom, nadzora i kontrole, uvjeta za rad privrednih društava i ostvarivanja statusa zaštitne radionice, te ostvarivanja pojedinih pogodnosti po ovom Zakonu.

III – OBJAŠNJENJE PREDLOŽENIH RJEŠENJA U ZAKONU

- 1) Člankom 1. predloženih izmjena izvršeno je terminološko usklađivanje izraza “smanjena radna sposobnost”, prema pozitivnim propisima iz oblasti penzijsko invalidskog osiguranja pa je isti u pojedinim člancima Zakona zamijenjen izrazom “promijenjena radna sposobnost”.
- 2) Člankom 2. izmjena i dopuna Zakona izvršeno je terminološko usklađivanje izraza: “ osobe sa lakom i umjerenom mentalnom retardacijom”, u smislu njegove adaptacije europskim i međunarodnim dokumentima u oblasti socijalne politike, te je umjesto istog upotrijebljen izraz “ osobe sa smetnjama u intelektualnom razvoju i funkcioniranju.

- 3) Članom 3. izmjena i dopuna, obzirom na Ustavno podijeljenu nadležnost u oblasti socijalne politike između Federacije i kantona, izvršena je dopuna stava 3., člana 3., u smislu da za ustanove za profesionalnu rehabilitaciju kojima je osnivač Federacija, propise o bližim uvjetima za osnivanje i rad propisuje federalni ministar.
- 4) Člankom 4. izmjena i dopuna Zakona, članku 17. se dodaje novi stav, stav 2., a to je postojeći stav 5. članka 19., što ima svoje logičko i semantičko opravdanje, s obzirom na naziv poglavlja („Pravo na zapošljavanje“) i njegov sadržaj.
- 5) Člankom 5. predloženih izmjena i dopuna uvodi se novi članak, čl. 17 a. kojim se uspostavlja vođenje evidencije o poslodavcima koji zapošljavaju osobe s invaliditetom. Ova evidencija ima višestruku praktičnu korist u smislu stvaranja osnova za praćenje zaposlenosti osoba s invaliditetom i kontrole izvršavanja obveze poslodavaca u tom pogledu.
- 6) Člankom 6. se u novom članku 18. na jedan jasniji i cjelovitiji način utvrđuje obveza poslodavaca da zapošljavaju osobe s invaliditetom i način kontrole izvršavanja te obveze.
- Stav 2. članka 18. otklanja nedoumice i dileme u pogledu obračunavanja posebnog doprinosa za poticanje zapošljavanja osoba s invaliditetom (tj. je li osnovica neto ili bruto plaća).
- Članku 18. dodaju se i novi stavovi 3., 4., 5. i 6.
- U stavu 3. se na jedan jasniji način definira obveza subjekata koji s obzirom na broj zaposlenih ne podliježu obvezi zadovoljavanja kvote zaposlenih osoba s invaliditetom predviđene u stavu 1. ovog članka. Stavom 4 se utvrđuje nadležnost Federalne uprave za inspekcijske poslove da vrši kontrolu izvršavanja obveze poslodavaca da zapošljavaju određeni broj osoba s invaliditetom u odnosu na ukupan broj zaposlenih, a stavom 5. se uspostavlja nadležnost Porezne uprave FBiH da vrši kontrolu obračunavanja i uplate posebnog doprinosa.
- Stavom 6. se strana diplomatska i konzularna predstavništva, privredna društva za zapošljavanje osoba s invaliditetom, zaštitne radionice, radni centri, ustanove za profesionalnu rehabilitaciju i organizacije osoba s invaliditetom izuzimaju iz obveza plaćanja posebnog doprinosa.
- 7) Člankom 7. predloženih izmjena i dopuna se briše postojeći članak 19. jer su njegove odredbe ugrađene u prethodne članke Zakona, a dodaje se novi članak 19. koji ima za cilj jasno definiranje posebnog doprinosa za poticanje zapošljavanja osoba s invaliditetom, njegovog karaktera, statusa i tretmana. Takođe, ovim člankom se utvrđuje termin za početak obračunavanja i uplate posebnog doprinosa, što se u praksi pokazalo potrebnim zbog različitih tumačenja, pri čemu je uvažena sugestija Ureda za zakonodavstvo i usklađenost sa propisima EU, da se pomenuta

- odredba ne može primjenjivati počevši od 01.01.2011.godine, pa je kao datum početka uplate utvrđen novi datum 01.01.2013.godine..
- 8) Člankom 8. se iz čisto logičkih i semantičkih razloga, u članku 22. Zakona dodaje novi stav, stav 2. Zakona, a to je postojeći čl. 24, te novi stav, stav 3. koji precizira način donošenja rješenja o prestanku statusa privrednog društva za zapošljavanje osoba s invaliditetom.
 - 9) Člankom 9. izmjena i dopuna briše se u članku 23. stav 3., jer njegov sadržaj se uključuje u novi članak 24. Zakona.
 - 10) Novi članak 24. se dodaje s ciljem da se potpunije i jasnije utvrde uvjeti za početak rada društva za zapošljavanje i dobijanje statusa privrednog društva za zapošljavanje osoba s invaliditetom, odnosno zaštitne radionice. To je potrebno jer postojećim zakonom to pitanje nije određeno i cjelovito uređeno.
 - 11) Člankom 11. Izmjena i dopuna se briše članak 29. i umjesto njega dodaje novi članak 29. koji jasno precizira uvjete za stjecanje statusa zaštitne radionice, čime se otklanjaju prisutna različita tumačenja i njima izazvani problemi u praktičnoj primjeni Zakona.
 - 12) Člankom 12. izmjena i dopuna se u članku 51. dodaje novi stav, stav 3. u cilju utvrđivanja maksimalnog iznosa (limita) do kojeg se isplaćuje naknada po osnovu uplaćenih poreza i doprinosa iz stava 1. ovog članka. Opravdanje za to je u sprječavanju eventualnih zloupotreba ove pogodnosti i svrsishodno i pravednije korištenje sredstava Fonda.
 - 13) Člankom 14. se u članku 52. u stavovima 2. i 3. Zakona produžavaju rokovi za podnošenje zahtjeva, odnosno isplatu novčanih naknada, što, kako se u dosadašnjoj praksi pokazalo, ima praktično i isključivo tehničko opravdanje, obzirom na složenost same procedure.
 - 14) Člankom 15. mijenja se stav 2. postojećeg članka 62., te istim u cilju ekonomičnosti i učinkovitosti, smanjuje ukupan broj članova Upravnog odbora Fonda, te analogno tome i broj predstavnika organizacija osoba s invaliditetom.
Novim stavom 3. precizira se koje osobe, kao vršitelji određenih funkcija, ne mogu biti birane na mjesta članova Upravnog odbora.
 - 15) Člankom 16. mijenja se stav 1. postojećeg članka 63., te istim smanjuje broj članova Nadzornog odbora Fonda, dok se novim stavom 2., predviđa obveza da najmanje jedan član Nadzornog odbora bude predstavnik organizacija osoba s invaliditetom, koje su osnivači ili vlasnici ustanova i privrednih društava za profesionalnu rehabilitaciju osoba s invaliditetom.
 - 16) Članak 17. predloženih izmjena i dopuna Zakona ima isključivo tehnički, korektivni i formalni karakter, te je neophodan radi uspostave cjelovitosti i

sistematičnosti teksta Zakona, koja je nužna ukoliko bi se ove predložene izmjene i dopune inkorporirale.

IV – FINACIJSKE IMPLIKACIJE PREDLOŽENIH IZMJENA

Za provođenje predloženih izmjena i dopuna ovog Zakona nisu potrebna dodatna financijska sredstva.

V – OBRAZLOŽENJE PRIMJEDBI UREDA VLADE FEDERACIJE BOSNE I HERCEGOVINE ZA ZAKONODAVSTVO I USKLAĐENOST SA PROPISIMA EUROPSKE UNIJE, FEDERALNOG MINISTARSTVA PRAVDE I FEDERALNOG MINISTARSTVA FINANSIJA

Na pomenute izmjene i dopune Zakona, svoju suglasnost ali i primjedbe dali su i Ured Vlade FBiH za zakonodavstvo i usklađenost sa propisima EU, Federalno ministarstvo pravde i Federalno ministarstvo finansija.

Ured Vlade FBiH za zakonodavstvo i usklađenost sa propisima EU, u svom mišljenju istakao je da u odnosu na dostavljeni tekst Prednacrta Zakona nema primjedbi, osim u odnosu na članak 6., stav 3., kojim je predviđeno da se poseban doprinos započinje obračunavati i uplaćivati počev od januara 2011. godine, odnosno retroaktivno. Navedena primjedba je djelomično uvažena pa je pomenuti članak izmjenjen u smislu da je ista obaveza utvrđena sa sječnjem tekuće godine. Kako je kategorija „posebnog doprinosa“ utvrđena osnovnim Zakonom koji je stupio na snagu u ožujku 2010.godine, smatramo da sama odredba faktički nije retroaktivnog karaktera, već se može reći da je ovim izmjenama samo pooštrena u njoj sadržana obaveza.

Druga primjedba Ureda, odnosila se na nedostajanje mišljenja i primjedbi mjerodavnih organa u kantonima, s obzirom da u oblasti socijalne politike postoji zajednička nadležnost kantona i Federacije. U odnosu na navedenu primjedbu napominjemo da je prilikom usvajanja osnovnog teksta Zakona, pomenuta procedura u cjelosti ispoštovana. Kako se u konkretnom slučaju radi o izmjenama i dopunama koje faktički nemaju nikakve finansijske niti druge implikacije za bilo koje kantonalne organe ili kantonalne proračune, te obzirom na potrebu brzog rješavanja proceduralnih problema koji su se pojavili u praksi, a s kojim ciljem se naprijed navedene izmjene i vrše, nismo smatrali neophodnim pribaviti pomenuta mišljenja posebno imajući u vidu dužinu trajanja samog procesa u odnosu na dobivene rezultate i efikasnost postupka.

Svojim mišljenjem Federalno ministarstvo finansija dalo je suglasnost na Prednacrt zakona o izmjenama i dopunama Zakona o profesionalnoj rehabilitaciji, osposobljavanju i zapošljavanju osoba sa invaliditetom. Primjedba koju su istakli odnosi se na definiranje obaveze „posebnog doprinosa“ u smislu da se pomenuti novčani iznosi ne mogu tretirati kao doprinosi, kao i definiranje obaveze Porezne uprave Federacije BiH da vrši kontrolu uplate i obračuna posebnog doprinosa.

Kako je samim Zakonom i navedeno radi se o kategoriji „posebnog“ doprinosa, ustanovljenog isključivo u svrhu osiguranja održivosti Fonda za

profesionalnu rehabilitaciju, osposobljavanje i zapošljavanje osoba sa invaliditetom. U tom smislu je kao jedini adekvatan upotrijebljen i izraz „poseban“ i izraz „doprinos“. Dalje, u istom cilju je predviđena naprijed navedena obaveza Poreske uprave Federacije, smatrajući to jednim načinom potpunog i efikasnog osiguravanja naplate istog, odnosno jednim načinom osiguranja poštivanja pomenutih zakonskih odredbi.

Federalno ministarstvo pravde dalo je svoju suglasnost bez primjedbi i sugestija iz oblasti njihove nadležnosti.